

四庫全書

集部

欽定四庫全書

古詩鏡卷十

明陸時雍撰

晉第三

陶淵明

字元亮入宋名潛潯陽柴桑人太尉長沙公侃之曾孫少有高趣親老家貧起為州祭酒不堪

吏職解歸躬耕自資隆安中為鎮軍參軍義熙元年遷建威參軍未幾求為彭澤令在縣八十餘日解歸

暨入宋終身不仕願延年詠之謚曰靖節

淵明未嘗做詩詩自從中流出靈襟灑氣陶冶物情遠矣謝康樂人巧盡後宛若天工陶詩似月

到柳梢風來水面自
然之妙難以力與也

四言詩惟有王粲既溫且雅亦典亦則此外俱
駢麗語贊頌體淵明停雲雖佳然氣格亦晚

詩

九日閒居

并序

余閒居愛重九之名秋菊盈園而持醪靡由空服九
華寄懷於言

世短意常多斯人樂久生日月依辰至舉俗愛其名露
淒暄風息氣澈天象明往燕無遺影來鴈有餘聲酒能

祛百慮菊為制顏齡如何蓬廬士空視時運傾塵爵恥
虛罌寒華徒自榮斂襟獨聞謠緬馬起深情棲遲固多
娛淹留豈無成

棲遲固多娛淹留豈無成所成何事又即理愧通
識所保詎乃淺所保何物此老不屑屑自譽却怡
然自得

歸田園居

少無適俗韻性本愛丘山誤落塵網中一去三十年羈
鳥戀舊林池魚思故淵開荒南野際守拙歸園田方宅

十餘畝草屋八九間榆柳蔭後園桃李羅堂前曖曖遠
人村依依墟里煙狗吠深巷中鷄鳴桑樹顛戶庭無塵
雜虛室有餘閒久在樊籠裏復得返自然

野外罕人事窮巷寡輪鞅白日掩荆扉虛室絕塵想時
復墟曲中披草共來往相見無雜言但道桑麻長桑麻
日已長我志日已廣常恐霜霰至零落同草莽

一本作我土日已廣謂淵明志此非也不
知淵明志在飲酒行樂耳淵明要土何用

種豆南山下草盛豆苗稀晨興理荒穢帶月荷鋤歸道

狹草木長夕露沾我衣
沾不足惜但使願無違

曖曖四語極村樸是田家野老景色常恐霜霰
至零落同草莽又衣沾不足惜但使願無違深衷

隱隱
欲返

移居二首

昔欲居南村非為卜其宅
聞多素心人樂與數晨夕
懷此頗有年今日從茲役
弊廬何必廣取足蔽牀席
鄰曲時時來抗言談在昔
奇文共欣賞疑義相與析

春秋多佳日登高賦新詩
過門更相呼有酒斟酌之
農

務各自歸閒暇輒相思相思則披衣含笑無厭時此理
將不勝無為忽去茲衣食當須紀力耕不吾欺

此理將不勝無為忽去茲此實有得語衣食當須
紀力耕不吾欺此羲皇上人語亦羲皇上人事或
謂不吾欺者非也不吾欺是計
效於天吾不欺是盡道於已

癸卯歲始春懷古田舍二首

在昔聞南畝當年竟未踐屢空既有人春興豈自免風
晨裝吾駕啓塗情已緬烏弄懽新節冷風送餘善寒竹
被荒蹊地為罕人遠是以植杖翁悠然不復返即理愧

通識所保詎乃淺

先師有遺訓憂道不憂貧瞻望邈難逮轉欲忘常勤秉
耒懽時務解顏勸農人平時交遠風良苗亦懷新雖未
量歲功即事多所欣耕種有時息行者無問津日入相
與歸壺漿勞近鄰長吟掩柴門聊為隴畝民

屢空既有人春興豈自免無心標置意境自合冷
風送餘善冷風何善此非輕裘重帶語即是憑流
弄月自次通乎寒暑而如一者也人謂淵明得道
庶或有之先師有遺訓憂道不憂貧瞻望邈難
逮轉欲忘常勤愈平愈高轉近轉遠平時交遠
風良苗亦懷新似欣然有望長吟掩柴門聊為隴

畝民忘情語實
似未忘情語

巳酉歲九月九日

靡靡秋已夕淒淒風露交蔓草不復榮園木空自凋清
氣澄餘滓杳然天界高哀蟬無歸響叢雁鳴雲霄萬化
相尋繹人生豈不勞從古皆有沒念之中心焦何以稱
我情濁酒且自陶千載非所知聊以永今朝

清氣澄餘滓杳然天界
高澄澈如九秋天宇

庚戌歲九月中於西田獲早稻

人生歸有道衣食固其端孰云都不營而以求自安開
春理常業歲功聊可觀晨出肆微勤日入負耒還山中
饒霜露風氣亦先寒田家豈不苦弗獲辭此難四體誠
乃疲庶無異患干盥濯息簷下斗酒散襟顏遥遥沮溺
心千載乃相關但願長如此躬耕非所歎

人生歸有道衣食固其端孰云都不
營而以求自安此荷蓀丈人受用語

飲酒 并序

余閒居寡歡兼此夜已長偶有名酒無夕不飲顧影

獨盡忽馬復醉既醉之後輒題數句自娛紙墨遂多
辭無詮次聊命故人書之以為歡笑爾

衰榮無定在彼此更共之邵生瓜田中寧似東陵時寒
暑有代謝人道每如茲達人解其會逝將不復疑忽與
一觴酒日夕懼相持

衰榮無定在彼此更共之造語簡會達人
解其會二字最佳逝將不復疑是見道語

積善云有報夷叔在西山善惡苟不應何事立空言九
十行帶索饑寒况當年不賴固窮節百世當誰傳

道喪向千載人人惜其情有酒不肯飲但願世聞名所以貴我身豈不在一生一生能復幾條如流電驚鼎鼎百年內持此欲何成

語語清
澈圓映

結廬在人境而無車馬喧問君何能爾心遠地自偏採菊東籬下悠然見南山山氣日夕佳飛鳥相與還此中有真意欲辨已忘言

結廬在人境而無車馬喧問君何能爾心遠地自偏調笑怡然采菊東籬下悠然見南山是忘世語

山氣日夕佳飛鳥相與還此老
於世直無物不佳亦無物不樂

秋菊有佳色裛露綴其英
汎此忘憂物遠我遺世情一
觴雖獨進杯盡壺自傾日入羣動息歸鳥趨林鳴嘯噉
東軒下聊復得此生

杯盡壺自傾固知此物最
為知己自爾相勸彌殷

青松在東園衆草沒竒姿凝霜殄異類卓然見高枝連
林人不覺獨樹衆乃竒提壺撫寒柯遠望時復為吾生
夢幻間何事繼塵羈

提壺撫寒柯遠望時
復為所為樂而不厭

清晨聞叩門倒裳往自開問子為誰歟田父有好懷壺
漿遠見候疑我與時乖縑縷茅簷下未足為高栖一世
皆尚同願君汨其泥深感父老言稟氣寡所諧紆轡誠
可學違已詎非迷且共歡此飲吾駕不可回

在昔曾遠遊直至東海隅道路迥且長風波阻中塗此
行誰使然似為饑所驅傾身營一飽少許使有餘恐此
非名計息駕歸間居

顏生稱為仁榮公言有道屢空不獲年長饑至於老雖
留身後名一生亦枯槁死去何所知稱心固為好客養
千金軀臨化消其實裸葬何必惡人當解意表

傾身營一飽少許便有餘客養千
金軀臨化消其實此悟世深言

有客常同止趣舍邈異境一士長獨醉一夫終年醒
醉還相笑發言各不領規規一何愚兀傲差若顛寄言
酣中客日沒燭當炳

故人賞我趣挈壺相與至班荆坐松下數斟已復醉父

老雜亂言觴酌知有次不覺知有我安知物為貴悠悠
迷所留酒中有深味

貧居乏人工灌冰荒余宅班班有翔鳥寂寂無行跡宇
宙一何悠人生少至百歲月相催逼鬢髮早已白若不
委窮達素抱深可惜

羲農去我久舉世少復真汲汲魯中叟彌縫使其淳鳳
鳥雖不至禮樂暫得新洙泗輟微響漂流逮狂秦詩書
復何罪一朝成灰塵區區諸老翁為事誠殷勤如何絕

世下六籍無一親終日馳車走不見所問津若復不快
飲空負頭上巾但恨多謬誤君當恕醉人

若復不痛飲空負頭上巾
彼直以飲酒為第一義

歲暮和張常侍

市朝悽舊人驟驥感悲泉
明旦非今日歲暮余何言
素顏斂光潤白髮一已繁
潤哉秦穆談旅力豈未愆
向夕長風起寒雲沒西山
厲厲氣遂嚴紛紛飛鳥還
民生鮮常在矧伊愁苦纏
屢闕清醑至無以樂當年
窮通靡攸

慮顛賴由化遷撫已有深懷履運增慨然

首未隱衷耿耿可見乃不托為枉不激為憤
而寄之沈冥自適所為處亂世而不爭者矣

遊斜川并序

辛丑歲正月五日天氣澄和風物間美與二三隣曲
同遊斜川臨長流望曾城魴鯉躍鱗於將夕水鷗乘
和以翻飛彼南阜者名實舊矣不復乃為嗟歎若夫
曾城傍無依接獨秀中臯遙望靈山有愛嘉名欣對
不足率爾賦詩悲日月之遂往悼吾年之不留各疏

年紀鄉里以記其時日

開歲修五日吾生行歸休念之動中懷及辰為茲遊氣
和天惟澄班坐依遠流弱湍馳文魴閭谷矯鳴鷗迴澤
散游目緬然睇曾丘雖微九重秀顧瞻無匹儔提壺接
賓侶引滿更獻酬未知從今去當復如此不中觴縱遙
情忘彼千載憂且極今朝樂明日非所求

五月旦作和戴主簿

虛舟縱逸棹回復遂無窮發歲始俛仰星紀奄將中南

寬罕悴物北林榮且豐神淵寫時雨晨色奏景風既來
孰不去人理固有終居常待其盡曲肱豈傷冲遷化或
夷險肆志無宏隆即事如己高何必升華嵩

和劉柴桑

山澤久見招胡事乃躊躇直為親舊故未忍言索居良
辰入竒懷挈杖還西廬荒塗無歸人時時見廢墟茅茨
已就治新疇復舊畬谷風轉淒薄春醪解饑劬弱女雖
非男慰情良勝無栖栖世中事歲月共相疎耕織稱其

金分四庫全書
卷十
用過此奚所須去去百年外身名同翳如

酬劉柴桑

窮居寡人用時忘四運周櫛庭多落葉慨然知己秋新
葵鬱北牖嘉穉養南疇今我不為樂知有來歲不命室
攜童弱良日登遠遊

和郭主簿二首

藹藹堂前林中夏貯清陰凱風因時來回飈吹我襟息
交游閒業卧起弄書琴園蔬有餘滋舊穀猶儲今營已

良有極過足非所欽
春林作美酒酒熟吾自斟
弱子戲我側學語未成音
此事真復樂聊用忘華簪
遙遙望白雲懷古一何深

和澤周三春清涼素秋節
露凝無游氛天高肅景澈
陵岑聳逸峯遙瞻皆竒絕
芳菊開林耀青松冠巖列
懷此貞秀姿草為霜下傑
銜觴念幽人千載撫爾訣
檢素不獲展厭厭竟良月

贈羊長史并序

左軍羊長史銜使秦川作此與之

愚生三季後慨然念黃虞得知千載外上賴古人書賢
聖留餘跡事事在中都豈忘遊心目關河不可踰九域
甫已一逝將理舟輿聞君當先邁負病不獲俱路若經
高山為我少躊躇多謝綺與用精爽今何如紫芝誰復
採深谷久應蕪駟馬無貫患貧賤有交娛清謠結心曲
人乖運見疎擁懷累代下言盡意不舒

癸卯十二月中作與從弟敬遠

寢跡衡門下邈與世相絕顧盼莫誰知荆扉晝常閉
必結
切 淒淒歲暮風翳翳經日雪傾耳無希聲在目皓已潔
勁氣侵襟袖簞瓢謝屢設蕭索空宇中了無一可悅歷
覽千載書時時見遺烈高操非所攀深得固窮節平津
苟不由栖遲詐為拙寄意一言外茲契誰能別

於王撫軍座送客

秋日淒且厲百卉俱已腓爰以履霜節登高餞將歸寒
氣冒山澤游雲條無依洲渚思綿邈風水互乖違瞻夕

欲良讌離言聿云悲晨鳥暮來還懸車歛餘暉逝止判
殊路旋駕悵遲遲目送回舟遠情隨萬化遺

秋日凄且厲百卉具以彫爰以履霜節登高餞將
歸語致高潔目送孤舟遠情隨萬化遺送別得此

此老不隨
人語默者

始作鎮軍參軍經曲阿作

弱齡寄事外委懷在琴書被褐欣自得屢空常晏如時
來苟冥會宛轡憩通衢投策命晨裝暫與園田疏眇眇
孤舟逝綿綿歸思紆我行豈不遙登降千里餘目倦川

途異心念山澤居望雲慙高鳥臨水愧遊魚真想初在襟誰謂形跡拘聊且憑化遷終返班生廬

辛丑歲七月赴假還江陵夜行塗口作

閒居三十載遂與塵事冥詩書敦宿好林園無俗情如何捨此去遙遙至南荆叩柰新秋月臨流別友生涼風起將夕夜景湛虛明昭昭天宇濶晶晶川上平懷役不遑寐中宵尚孤征商歌非吾事依依在耦耕投冠旋舊墟不為好爵縈養真衡茅下庶以善自名

叩世新秋月臨流別友
生景色如次清湛無滓

乙巳歲三月為建威參軍使都經錢溪

我不踐斯境歲月好已積晨夕看山川事事悉如昔微
雨洗高林清飈矯雲翮眷彼品物存義風都未隔伊余
何為者勉勵從茲役一形似有制素襟不可易困田白
夢想安得久離析終懷在歸舟諒哉宜霜栢

桃花源詩并記

晉太元中武陵人捕魚為業緣溪行忘路之遠近忽

逢桃花林夾岸數百步中無雜樹芳草鮮美落英續
紛漁人甚異之復前行欲窮其林林盡水源便得一
山山有小口髣髴若有光便捨船從口入初極狹纔
通人復行數十步豁然開朗土地平曠屋舍儼然有
良田美池桑竹之屬阡陌交通雞犬相聞其中往來
種作男女衣著悉如外人黃髮垂髻並怡然自樂見
漁人乃大驚問所從來具答之便要還家設酒殺雞
作食村中聞有此人咸來問訊自云先世避秦時亂

率妻子邑人來此絕境不復出焉遂與外人間隔問
今是何世乃不知有漢無論魏晉此人一一為具言
所聞皆歎惋餘人各復延至其家皆出酒食停數日
辭去此中人語云不足為外人道也既出得其船便
扶向路處處誌之及郡下詣太守說如此太守即遣
人隨其往尋向所誌遂迷不復得路南陽劉子驥高
尚士也聞之欣然親往未果尋病終後遂無問津者
嬴氏亂天紀賢者避其世黃綺之商山伊人亦云逝往

迹浸復湮來逕遂蕪廢相命肆農耕日入從所憩桑竹
垂餘蔭菽稷隨時藝春蠶收長絲秋熟靡王稅荒路曠
交通鷄犬互鳴吠俎豆猶古法衣裳無新製童孺縱行
歌斑白歡游詣草榮識節和木衰知風厲雖無紀歷誌
四時自成歲怡然有餘樂于何勞智慧竒蹤隱五百一
朝敞神界淳薄既異源旋復還幽蔽借問游方士焉測
塵囂外願言躡輕風高舉尋吾契

擬古

迢迢百尺樓分明望四荒
幕作歸雲宅朝為飛鳥堂
山河滿目中平原獨茫茫
古時功名士慷慨爭此場
一旦百歲後相與還北邙
松柏為人伐高墳互低昂
顏基無遺主遊魂在何方
榮華誠足貴亦復可憐傷

日暮天無雲春風扇微和
佳人美清夜達曙酣且歌
歌竟長歎息持此感人多
皎皎雲間月灼灼葉中華
豈無一時好不久當如何

種桑長江邊三年望當採
枝條始欲茂忽值山河改
柯

葉自摧折根株浮滄海春蠶既無食寒衣欲誰待本不
植高原今日復何悔

雜詩

白日淪西河素月出東嶺遙遙萬里輝蕩蕩空中景風
來入房戶夜中枕席冷氣變悟時易不眠知夕永欲言
無子和揮杯勸孤影日月擲人去有志不獲騁念此懷
悲悽終曉不能靜

丈夫志四海我顧不知老親戚共一處子孫還相保觴

絃肆朝日罇中酒不燥緩帶盡懽娛起晚眠常早孰若
當世士冰炭滿懷抱百年歸丘壟用此空名道

詠貧士

萬族各有託孤雲獨無依曖曖空中滅何時見餘暉朝
霞開宿霧衆鳥相與飛遲遲出林翮未夕復來歸量力
守故轍豈不寒與饑知音苟不存已矣何所悲

讀山海經

孟夏草木長遶屋樹扶疎衆鳥欣有託吾亦愛吾廬既

耕亦已種時還讀我書窮巷隔深轍頗迴故人車歡言
酌春酒摘我園中蔬微雨從東來好風與之俱况覽周
王傳流觀山海圖俯仰終宇宙不樂復何如

衆鳥欣有托吾亦愛吾
廬覺物我大小俱得

擬挽歌辭

荒草何茫茫白楊亦蕭蕭嚴霜九月中送我出遠郊四
面無人居高墳正崔嵬馬為仰天鳴風聲自蕭條幽室
一已閉千年不復朝千年不復朝賢達將奈何向來相

送人各自還其家親戚或餘悲他人亦已歌死去何所
道託體同山阿

殷仲文

字仲文陳郡人少有才藻從兄仲堪薦用於會稽王道子後從桓玄反玄誅仲文為劉裕所殺

詩

南州栢公九井作

四運雖鱗次理化各有準獨有清秋日能使高興盡景
氣多明遠風物自淒緊爽籟驚幽律哀壑叩虛北歲寒
無早秀浮榮甘風墮何以標貞脆薄言寄松菌哲匠感

蕭晨肅此塵外軫廣筵散泛愛逸爵紆勝引伊余樂
好仁惑祛吝亦泯猥首阿衡朝將貽匈奴哂

桃葉

王獻之妾

詩

答團扇歌

青青林中竹可作白團扇動搖郎玉手因風托方便
團扇復團扇持許自障面憔悴無復理羞與郎相見

附謝芳姿團扇歌二首 白團扇辛苦五流連是郎
眼所見 白團扇顯顯頓昔日容羞與郎相見 古今

樂錄曰團扇歌者晉中書令王珉捉白團扇與婢謝芳姿有愛情好甚萬婢皆提婢過苦王東亭聞而止之芳姿素善歌妓令歌一曲當赦之應聲歌云云珉聞更問之汝歌何遺芳姿即改云云

附謝尚為鎮西將軍著紫羅襦據胡牀在市中佛國門樓上彈琵琶作大道曲市人不知為三公意其有出世韻及觀其曲云青陽二三月柳青桃復紅車馬不相識音落黃埃中絕無佳致乃知世之所口實者徒以其三公也

附蘭亭一宴賦詩者二十六人曾無善句非獨老莊為累亦氣運然也然王右軍作序靈襟冥會高雅絕倫人以金谷序比之已謂不韻乃右軍得此欣然將人固不自信耶抑多財者能使文重也左思作三都賦得皇甫謐序而始傳而序固不佳於賦然則家非石崇序無皇甫高材命世不得一傳於後者又豈少

哉乎



古詩鏡卷十

欽定四庫全書

集部

古詩鏡卷十一至
五

詳校官庶吉士臣范逢恩

主事銜臣徐以坤覆勘

總校官編修臣王燕緒

校對官中書臣陳墉

謄錄監生臣陳廷桂

欽定四庫全書

古詩鏡卷十一

晉第四

樂府

獨漉篇

獨漉獨漉水深泥濁泥濁尚可水深殺我雍雍雙鴈遊
戲田泮我欲射鴈念子孤散翩翩浮萍得風搖輕我心

明
陸時雍
編

何合與之同并空牀低帷誰知無人夜衣錦繡誰別偽
真刀鳴箭中倚牀無施父冤不報欲活何為猛虎斑斑
遊戲山間虎欲齧人不避豪賢

徘徊憤激氣法干將 我欲射鴈念子孤散是俠
烈肝腸語衣衣錦繡誰別偽真丈夫當年概必有
見以自

白紵舞歌詩三首

輕軀徐起何洋洋高舉兩手白鷓翔宛若龍轉乍低昂
凝停善睐容儀光如推若引留且行隨世而變誠無方

舞以盡神安可忘晉世方昌樂未央質如輕雲色如銀
愛之遺誰贈佳人制以為袍餘作巾袍以光軀巾拂塵
麗服在御會佳賓醪醴盈樽美且淳清歌徐舞降祇神
四座歡樂胡可陳

雙袂齊舉鸞鳳翔羅裙飄颻昭儀光趨步生姿進流芳
鳴弦清歌及三陽人生世間如電過樂時每少苦日多
幸及良辰耀春華齊倡獻舞趙女歌羲和馳景逝不停
春露未晞嚴霜零百草凋索花落英蟋蟀吟牖寒蟬鳴

百年之命忽若傾
早知迅速秉燭行
東造扶桑遊紫庭
西至崑崙戲曾城

陽春白日風花香
趨步明玉舞瑤聲
發金石媚笙簧
羅袿徐轉紅袖揚
清歌流響繞鳳梁
如矜若愚疑且翔
轉盼遺精豔輝光
將流將引雙鴈行
歡來何晚意何長
明君御世永歌昌

清商曲辭

古辭

五言絕句沿歌成體
截語作句大都尋常口語
蓮子黃葉石闕春鶯等類
正托懷寓興夫歌通意之

微詞也。觸意遂成，不假思致。唐人加以彫飾，則語愈工，而體愈遠矣。古歌之妙，在標格天成，風騷滿懷，抱詩家比義，蓋假物摭情，流連無盡。故多以淺淺語作深深意。古詩藁砧，今何在？山上復有山，何日大刀頭，破鏡飛上天。此詩中隱語，凡情深者語隱，一似不能出諸口，一似不欲令人曉。

子夜歌

唐書樂志曰：子夜歌者，晉曲也。晉有女子名子夜，造此聲，聲過哀苦。樂府解題曰：後人更為四時行樂之詞，謂之子夜四時歌。又有大子夜歌、子夜警歌、子夜變歌，皆曲之變也。

落日出前門，瞻矚見子度。冶容多安鬢，芳香已盈路。芳是香所為，冶容不敢當。天不奪人願，故使儂見郎。

語甚

欣幸

宿昔不梳頭絲髮被兩肩
婉伸郎膝下何處不可憐
見娘喜容媚願得結金蘭
空織無經緯求匹理自難

是悅歡語

幾為躑躅

始欲識郎時兩心望如一
理絲入殘機何悟不成匹

殷勤款曲不

知費幾情緒

今日已歡別合會在何時
明燈照空局悠然未有期
高山種芙蓉復經黃蘗塢
果得一蓮時流離嬰辛苦

是喜是痛
寒暖自知

朝思出前門暮思還後渚語笑向誰道腹中陰憶汝
擊枕北牕卧郎來就儂嬉小喜多唐突相憐能幾時
駐筇不能食蹇蹇步幃裏投瓊著局上終日走博子
郎為傍人欺負儂非一事攤門不安橫無復相關意
年少當及時蹉跎日就老若不信儂語但看霜下草
感歡初殷勤歎子後遼落打金側瑤瑁外艷裏懷薄

巧映

擘裙未結帶約眉出前牕羅裳易飄颻小開罵春風
舉酒待相勸酒還盃亦空願因微觴會心感色亦同
儂年不及時其於作乖離素不知浮萍轉動春風移

若不信儂語但看霜下草素不
知浮萍轉動春風移下語絕快

夜長不得眠轉側聽更鼓無故歡相逢使儂肝腸苦

無故歡相逢使儂肝腸苦咄
咄作懊恨語正是思之極處

歡從何處來端然有憂色三喚不一應有何比松柏

猜情怪語 情寂
深長語何箇會

夜長不得眠
明月何灼灼
想聞散喚聲
虛應空中諾

想聞散喚聲虛應
空中諾自是極想

我念歡的的
子行由豫情
霧露隱芙蓉
見蓮不分明

人情難言假之物象故比言當是倍勝非第借蓮
為憐借絲為思霧露隱芙蓉見蓮不分明此言實
有意

儂作北辰星
千年無轉移
歡行白日心
朝東暮還西
憐歡好情懷
移居作鄉里
桐樹生門前
出入見梧子

子夜四時歌

春歌

光風流月初新林錦花舒情人戲春月窈窕曳羅裾

光風流月初碧樓冥初月俏骨麗
色採格絕佳此當是齊梁人語

碧樓冥初月羅綺垂新風含春未及歌桂酒發清容

杜鵑竹裏鳴梅花落滿道燕女遊春月羅裳曳芳草

燕女遊春月羅裳曳
芳草二句無情有色

朱光照綠苑丹華粲羅星那能閨中繡獨無懷春情

羅裳迤紅袖玉釵明月璫冶遊步春露豔覓同心郎

豔覓同心卽豔字佳
絕覺情致奕奕勃溢

春林花多媚春鳥意多哀
春風復多情吹我羅裳開
新燕弄初調杜鵑競晨鳴
畫眉忘注口遊步散春情
梅花落已盡柳花隨風散
歎我當春年無人相要喚

情如傾筐
不厭其盡

昔別鴈集渚今還燕巢梁
敢辭歲月久但使逢春陽
春園花就黃陽池水方淥
酌酒初滿杯調絃始成曲
明月照桂林初花錦繡色
誰能不想思獨在機中織

思見春花月含笑當道路逢儂多欲擷可憐持自誤
自從別歡後歎惜不絕響黃蘗向春生苦心隨日長

妙喻

詩譬之美人俏骨如雙輔承權
麗色如清臚轉盼亭亭如雲艷艷如月

夏歌

高堂不作壁招取四面風吹歡羅裳開動儂含笑容
反覆華簾上屏帳了不施郎君未可前待我整容儀
疊扇放牀上企想遠風來輕袖拂華妝窈窕登高堂

輕袖拂華妝窈窕

登高堂語氣高華

含桃已中食郎贈合歡扇深感同心意蘭室期相見
暑盛靜無風夏雲薄暮起攜手密葉下浮瓜沉朱李
鬱蒸仲暑月長嘯北胡邊芙蓉始結葉拋豔未成蓮
適見載青幡三春已復傾林鵲改初調林中夏蟬鳴
春桃初發紅惜色恐儂擿朱夏花落去誰復相尋覓
青荷蓋淥水芙蓉葩紅鮮郎見欲採我心欲懷蓮
四周芙蓉池朱堂敞無壁珍簟鏤玉牀繾綣任懷適
情知三夏熱今日徧獨甚香巾拂玉席共郎登樓寢

輕衣不重綵，颼風故不涼。三秋何時過，許儂紅粉妝。

許儂紅粉妝許字妖艷情致勃勃騷動善詩者神情色笑一迸而出

秋歌

風清覺時涼，明月天色高。佳人理寒服，萬結砧杵勞。
清露凝如玉，涼風中夜發。情人不還卧，冶遊步明月。
開牕秋月光，滅燭解羅裳。含笑惟幌裏，舉體蘭蕙香。
秋夜涼風起，天高星月明。蘭房競妝飾，綺帳待雙情。
涼風開牕寢，斜月垂光照。中宵無人語，羅幌有雙笑。

掘作九州池盡是大宅裏處處種芙蓉
婉轉得蓮子
初寒八九月獨纏自絡絲寒衣尚未了
郎喚儂底為
秋愛兩兩鴈春感雙雙燕
蘭鷹接野雞雉落誰當見
秋風入牕裏羅帳起飄颺
仰頭看明月寄情千里光
別在三陽初望還
九秋暮惡見東流水終年不西顧

冬歌

淵冰厚三尺素雪覆千里我心如松柏
君情復何似
塗濕無人行冒寒往相覓
若不信儂時但看雪上跡

夜半冒霜來見我，輒怨唱懷冰。閣中倚已寒，不蒙亮。

懷冰閣中倚已寒
不蒙亮是煩寃語

炭鑪却夜寒，重袍坐疊褥。與郎對華榻，弦歌秉蘭燭。
冬林葉落盡，逢春已復曜。葵藿生谷底，傾心不蒙照。
未嘗經辛苦，無故彊相矜。欲知千里寒，但看井水冰。

上聲歌

儂本是蕭草，持作蘭桂名。芬芳頓交盛，感郎為上聲。
新衫繡兩襠，迮著羅裙裏。行步動微塵，羅裙隨風起。

歡聞歌

遙遙天無柱流漂萍無根單身如熒火持底報郎恩

歡聞變歌

古今樂錄曰歡變歌者晉穆帝升平中童子輩忽歌於道曰阿子聞曲終輒云阿子汝聞不無幾而穆帝崩褚太后哭阿子汝聞不聲既悽苦因以名之

歡來不徐徐陽牕都銳戶耶婆尚未眠肝心如椎櫓
張翬不得魚不櫓翬空歸君非鷓鴣鳥底為守空池

似有狂童之嘲

刻木作班鷓有翅不能飛
搖著帆檣上望見十里磯
鏤臂欲飲血牛羊持祭天
沒命成灰土終不罷相憐

後二句是
飲血語

前溪歌

宋書樂志曰前溪歌者晉車騎將軍沈
玩所制都昂樂府解題曰前溪舞曲也

憂思出門倚逢郎前溪度莫作流水心
引新都捨故為家不鑿井擔瓶下前溪
開穿亂漫下但聞林鳥啼黃葛生爛漫
誰能斷葛根寧斷嬌兒乳不斷郎殷勤

俚而旨
快痛欲絕

黃葛結蒙籠生在洛溪邊
花落逐水去何當順流還
亦不復鮮

前溪滄浪映通波
澄淥清聲弦傳不絕
千載寄汝名永
與天地并

五句一疊覺其韻更長
故聲格亦詩中一事

阿子歌

春月故鳴啼
獨雄顛倒落
工知悅弦死
故來相尋博

團扇郎

古今樂錄曰團扇郎歌者晉中書令王珉捉白團扇與嫂婢謝芳姿有愛情好甚篤嫂捶撻婢過苦王東亭聞而止之芳姿素善歌嫂令歌一曲當赦之應聲歌曰白團扇辛苦五流連是郎眼所見珉聞更問之汝歌何遺芳姿即改云白團扇顯穎非音容羞與郎相見後人因而歌之

御路薄不行窈窕決橫塘團扇彰白日面作芙蓉光

七日夜女郎歌

三春怨離泣九秋欣期歌駕鸞行日時月明濟長河
婉孌不終夕一別周年期桑蠶不作繭晝夜長懸絲

靈匹怨離處索居隔長河玄雲不應雷是儂啼歎歌

黃生曲

松柏葉青箒石榴花葳蕤迮置前後事歡今定誰憐

黃鵠曲

列女傳曰魯陶嬰者魯陶明之女也少寡養幼孤無彊昆弟魯人或聞其義將求焉嬰乃作歌明已之不更二庭也魯人聞之不敢復求按黃鵠本漢橫吹曲名

黃鵠參天飛半道鬱徘徊腹中車輪轉君知思憶誰

黃鵠參天飛半道還後渚欲飛復不飛悲鳴覓羣侶

桃葉歌

古今樂錄曰桃葉歌者晉王子敬之所作也桃葉子敬妾名緣於篤愛所以歌之

桃葉映紅花無風自婀娜春花映何限感郎獨採我

長樂佳

欲知長樂佳中陵羅睢鳩美死兩心齊

同前

紅羅複斗帳四角垂珠璫玉枕龍鬚席郎眠何處牀

語色
風華

歡好曲

窈窕上頭歡那得及破瓜但看脫葉蓮何如芙蓉花
逶迤總角年華艷星間月遙見情傾處不覺喉中噦

懊儂歌

古今樂錄曰懊儂歌者晉石崇綠珠所作唯綠布
澀難縫一曲而已後皆隆安初民間訛謠之曲

我與歡相憐約誓底言者常歎負情人郎今果成詐
暫薄牛渚磯歡不下廷板水深沾儂衣白黑何在浣

水深沾儂衣白黑何在浣語
意絕慧可以解朝復可藏垢

山頭草歡少四面風趨使儂顛倒

懊惱奈何許夜聞家中論不得儂與汝

黃竹子歌

江邊黃竹子堪我女兒箱一船使兩槳得娘還故鄉

江陵女歌

雨從天上落水從橋下流拾得娘裙帶同心結兩頭

此歌一本謂隋煬帝所為天津橋上水天津橋下流拾得娘裙帶同心結兩頭此乃無情為有情也

神弦歌

聖郎曲

左亦不佯佯右亦不翼翼仙人在郎傍玉女在郎側酒
無沙糖味為他通顏色

酒無沙糖味為他
通顏色是妙情語

明下童曲

走馬上前阪石子彈馬蹄不惜彈馬蹄但惜馬上兒

詩中一轉生趣
人中一轉生情

陳孔驕赭白陸郎乘斑駁徘徊射堂頭望門不欲歸

三洲歌

唐書樂志曰三洲商人歌也古今樂錄曰三洲歌者商客數遊巴陵三江口住還因共作此歌其舊辭云啼將別共來梁武帝問法雲聞法師善解音律此歌何如法雲曰應歡會而有別離啼將別可改為歡將樂故其歌和云三洲斷江口水從窈窕河傍流歡將樂共來長相思

風流不暫停三山隱行舟願作比目魚隨歡千里遊

湘東醺醪酒廣州龍頭鐺玉樽金鏤椀與郎雙杯行

採桑度

蠶生春三月春桑正含綠女兒採春桑歌吹當春曲

繫條採春桑採葉何紛紛採桑不裝鈎牽壞紫羅裙

是冶遊

艷語

青陽度 三曲

古今樂錄曰青陽度倚歌凡

倚歌悉用鈴鼓無弦有吹

隱機倚不織尋得爛漫絲成匹郎莫斷憶儂經絞時

碧玉擣夜砧七寶金蓮杵高舉徐徐下輕擣只為汝

青荷蓋綠水芙蓉披紅鮮下有並根藕上生並頭蓮 並頭

一作同心

來羅

鬱金黃花標下有同心草
草生日已長
人生日就老

語格
老

那呵灘

我去只如還
終不在道邊
我若在道邊
良信寄書還
江陵三千三
何足特作遠
書疏數知聞
莫令信使斷
聞歡下揚州
相送江津
彎願得篙
檣折交郎到頭還

孟珠二曲

人言孟珠富信實金滿堂龍頭銜九花玉釵明月璫
陽春二三月草與水同色攀條摘香花言是歡氣息

同前

陽春二三月草與水同色道逢遊冶郎恨不早相識
望歡四五年實情將懊惱願得無人處回身與郎抱
適聞梅作花花落已成子杜鵑繞林啼思從心上起

好標
格

翳樂

人生歡愛時少年新得意一旦不相見輒作煩冤思

夜黃

湖中百種鳥半雌是半雄鴛鴦逐野鴨恐畏不成雙

夜度娘

夜來冒霜雪晨去履風波雖得叙微情奈儂身苦何

雙行纏

朱絲繫腕繩真如白雪凝非但我言好衆情共所稱

黃督

喬客他鄉人三春不得歸願看楊柳樹已復藏班騅

白附鳩

石頭龍尾彎新亭送客渚酤酒不取錢卽能飲幾許

拔蒲

朝發桂蘭渚晝息桑榆下與君同拔蒲竟日不成把

作蠶絲

春蠶不應老晝夜常懷絲何惜微軀盡纏綿自有時

苦情語

罄甚

績蠶初成繭相思條女宓投身湯水中貴得共成匹
素絲非常質屈折成綺羅敢辭機杼勞但恐花色多

長干曲

逆浪故相邀菱舟不怕搖妾家揚子住便弄廣陵潮

青溪小姑曲

按于寶搜神記曰廣陵蔣子文嘗為秣陵尉因擊賊傷而死吳孫權時封中都侯立廟鍾山異苑曰青溪小姑蔣侯第三妹也

開門白水側近橋梁小姑所居獨處無郎

安東平五曲

淒淒烈烈北風為雪船道不通步道斷絕
吳中細布闊幅長度我有一端與郎作袴
微物雖輕拙手所作餘有三丈為郎別厝
制為輕巾以奉故人不持作好與郎拭塵
東平劉生復感人情與郎相知當解千齡

樂辭

祝穆曰窮袴襦也蓋漢人語
吳兢編此辭在十九首後

繡幙圍香風耳節朱絲桐不知理何事淺立經營中愛
惜加窮袴防閑託守宮今日牛羊上丘隴當年近前面
發紅

休洗紅二首

休洗紅洗多紅色淡不惜故縫衣記得初按苗人壽百
年能幾何後來新婦今為婆

休洗紅洗多紅在水新紅裁作衣舊紅番作裏迴黃轉
綠無定期世事返復君所知

雜詩

玉釵色未分衫輕似露腕舉袖欲障羞迴持髮亂

古詩鏡卷十一

欽定四庫全書

古詩鏡卷十二

明陸時雍編

宋第一

孝武帝

諱駿字休龍文帝第三子封武陵王元凶
幼弑逆舉兵誅助遂即大位在位十年

詩自宋一大變氣變而詔色變而麗體變
而整句變而琢於古漸遠於律漸開矣

詩

遊覆舟山

束髮好怡行弱冠頗流薄素想終勿傾幸來果丘壑層
峯亘天維曠渚綿地絡逢臯列神苑遭壇樹仙閣松塔
含青暉荷源煜彤爍川界泳遊鱗巖庭響鳴鶴

與廬陵王紹別

連歲矜離心今茲幸良集信宿窮晨暮開顏披所戢未
盡歡娛懷已傷歧路及舳艫引江介飛旌背爾邑悄擾
徒旅戒團樂流景入遲遲分手念泫泫登路泣

拜衡陽文王義季墓

昧旦憑行軾濡露及山庭投步矜履蹈舉目增淒清
軫路滅歸軫淪闔負重扃深松朝已霧幽隧晏未明
長楊敷晚素宿草披初青哀往起沈泉追愛慟中情
竹帛憑年遠世範隨伏傾

聲色璀璨自

開宋氣之始

樂府

丁督護歌

一曰阿督護宋書樂志曰督護歌者彭城內史徐
逵之為魯軒所殺宋高祖使府內直督護丁昨收

歛殯埋之送之妻高祖長女也呼昨至閣下自問
殮送之事每問輒歎息曰丁督護其聲哀切後人
因其聲廣為曲馬唐書樂志曰丁督護
晉宋間曲也今歌是宋孝武帝所製云

洛陽數千里孟津流無極辛苦戎馬間別易會難得

聞歡去北征相送直瀆浦只有淚可出無復情可吐

督護初征時儂亦惡聞許願作石尤風四面斷行旅

顏延之

字延年琅邪臨沂人性疎淡不護細行而文章冠絕當時初為宋公豫章世子叅軍及公即帝

位補太子舍人廬陵王待之甚厚執政以其構扇異同因帝崩出為始安太守文帝元嘉三年徵為中書侍郎未幾復出守永嘉孝武登阼以為為金紫光祿大夫卒贈特進謚曰憲

延之彫結滿腸荆棘滿手以故意致雖密神韻不生語多蒙氣湯惠休謂謝靈運似芙蓉出水頗延之似錯彩鏤金此蓋謂其人力雖勞天趣不具耳

詩

應詔觀北湖田牧

周御窮轍跡夏載歷山川蓄軫豈明懋善遊皆聖仙帝
暉膺順動清蹕巡廣廡樓觀眺豐穎金駕映松山飛奔
互流綴緹鼓代迴環神行埒浮景爭光溢中天開冬春
徂物殘悴盈化先陽陸團精氣陰谷曳寒煙攢素旣森

藹積翠亦葱芊息饗報嘉歲通急戒無年溫渥決輿隸
和惠屬後筵觀風久有作陳詩愧未妍疲弱謝陵遽取

累非纏牽

蓄軫豈明懋善遊皆聖仙自是累句開冬春祖物
殘悴盈化仙謝靈運皇心美陽澤萬象咸光昭工
拙居然
具別

拜陵廟作

周德恭明祀漢道尊光靈哀敬隆祖廟崇樹加園塋逮
事休命始投迹階王庭陪厠迴天顧朝讌流聖情早服

身義重晚達生戒輕否來王澤竭泰往人悔形敕躬慙
積素復與昌運并恩合非漸漬榮會在逢迎夙御嚴清
制朝駕守禁城束紳入西寢伏軫出東坳衣冠終冥漠
陵邑轉葱青松風遵路急山烟冒壠生皇心憑容物民
思被歌聲萬紀載絃歌千歲託旒旌未殊帝世遠已同
淪化萌幼壯困孤介未暮謝幽貞發軌喪夷易歸軫慎

倚傾

恩合非漸漬榮會在逢迎此是何語皇心憑容物
民思被歌聲稍得真然松風遵路急遵字無謂

贈王太常

玉水記方流，璇源載圓折。蓄寶每希聲，雖秘猶彰徹。聆
龍際音切九淵，聞鳳窺丹穴。歷聽豈多士，歸然覩時哲。舒

文廣國華，敷言遠朝列。德輝灼邦懋，芳風被鄉耆。側同
幽人居，郊扉常晝閉。林間時晏開，亟迴長者轍。庭昏見
野陰，山明望松雪。靜惟決羣化，徂生入窮節。豫往誠歡
歇，悲來非樂闕。屬美謝繁翰，遙懷具短札。

直東宮答鄭尚書

皇居體環極設險祇天工兩關阻通軌對禁限清風跂
予旅東館徒歌屬南塘寢興鬱無已起觀辰漢中流雲
藹青闕皓月鑿丹宮踟躕清防密徙倚恒漏窮君子吐
芳訊感物惻余衷惜無丘園秀景行彼高松知言有誠
貫美價難克克何以銘嘉貺言樹絲與桐

北使洛

沈約宋書曰延之為豫章世子中軍行參軍義熙十二年高祖北伐有宋公之授府遣一使慶殊命參起居延之至洛陽道中作詩一

首文辭藻麗為謝晦傅亮所賞

改服飾徒旅首路跼險艱振楫發吳洲秣馬陵楚山塗
出梁宋郊道由周鄭間前登陽城路日夕望三川在昔
輟期運經始閤聖賢伊瀛絕津濟臺館無尺椽宮陞多
巢穴城闕生雲煙王猷升八表嗟行方暮年陰風振涼
野飛雲翥窮天臨塗未及引置酒慘無言隱憫徒御悲
威遲良馬煩遊役去芳時歸來屢徂僂蓬心既已矣飛
薄殊亦然

還至梁城作

眇然軌路長
憔悴征戍勤
昔邁先祖師
今來後歸軍
振策賸東路
傾側不及羣
息徒顧將及
極望梁陳分
故國多喬木
空城凝寒雲
丘隴填郭郭
銘誌滅無文
木石局幽閨
黍苗延高墳
惟彼雍門子
吁嗟孟嘗君
愚賤同埋滅
尊貴誰獨聞
曷為久遊客
憂念坐自殷

始安郡還都與張湘州登巴陵城樓作

江漢分楚望
衡巫奠南服
三湘淪洞庭
七澤藹荆牧
經塗延舊軌
登闈訪川陸
水國周地險
河山信重複
却倚

雲夢林前瞻荆臺
園清露霽岳陽曾暉
薄瀾澳悽矣自
遠風傷哉千里目
萬古陳往還百代
勞起伏存沒竟何
人炯介在明淑請
從上世人歸來藝
桑竹

一起景
色畧盡

五君詠五首

阮步兵

阮公雖淪跡
識密鑿亦洞沈
醉似埋照寓
辭類託諷長
嘯若懷人越
禮自驚衆物
故不可論途
窮能無慟

嵇中散

中散不偶世本自餐霞人形解驗默仙吐論知凝神立
俗迂流議尋山洽隱淪鸞翮有時鍛龍性誰能馴

劉參軍

劉伶善閉關懷情滅聞見鼓鐘不足歡榮色豈能眩
精日沈飲誰知非荒宴頌酒雖短章深衷自此見

阮始平

仲容青雲器實稟生民秀連音何用深識微在金奏郭

奕已心醉山公非虛覲屢薦不入官一麾乃出守

向常侍

向秀甘淡薄深心託毫素探道好淵玄觀書鄙章句交
呂既鴻軒攀嵇亦鳳舉流連河裏遊惻愴山陽賦

五君詠多自况

結語新然高峙

附秋胡九首情寡詞繁

倚梧傾高鳳寒谷待鳴律

影響豈不悚自遠每相匹婉彼幽聞女作嬪君子室

峻節貫秋霜明艷侔朝日嘉運既我從欣願自此畢

燕居未及好良人顧有違脫巾千里外結綬登王

畿戒徒在昧旦左右來相依驅車出郊郭行路正威

遲存為久離別沒為長不歸嗟余怒行役三陟窮

晨暮嚴駕越風寒解鞍犯霜露原隰多悲涼迴馳卷
高樹離獸起荒蹊驚鳥縱橫去悲哉遊宦子勞此山
川路 起搖行人遠宛轉年運徂良時為此別日月
方向除孰知寒暑積俛俛見榮枯歲暮臨空房涼風
起坐隅寢興日已寒白露生庭蕪 勤役從歸願反
路遵山河昔辭秋未素今也歲載華蠶月觀時暇奈
野多經過佳人從所務窈窕援高柯傾城誰不顧弭
節停中阿 年往誠思勞路遠閨音形雖為五載別
相與昧平生捨車遵往路鳧藻馳日成南金豈不重
聊自意所輕義心多苦調密比金玉聲 高節難久
淹竭來空復辭遲遲前途盡依依造門基上堂拜嘉
慶入室問何之日暮行來歸物色桑榆時美人望昏
至慙歎前相持 有懷誰能已聊用中苦難離居殊
年載一別阻河闊春來無時豫秋至恒早寒明發動
愁心閨中起長歎慘悽歲方晏日落遊子顏 高張
生絕弦聲急由調起自昔枉光塵結言固終始如何

久為別百行僇諸已君子失明義誰
與借沒齒愧彼行靈詩甘之長川沈

謝瞻

字宣遠六歲能屬文與從叔混族弟靈運俱有威
名晉義熙中為安城太守宋初除中書侍郎以弟

晦當朝乃求出守

守豫章遇病卒

詩

張子房詩

王風哀以思周道蕩無章卜洛易隆替興亂罔不亡力
政吞九鼎苛慝暴三殤息肩纏民思靈鑿集朱光伊人
感代工聿來扶興王婉婉幙中畫輝輝天業昌鴻門銷

薄蝕垓下隕攬槍爵仇建蕭宰定都護儲皇肇允契幽
叟翻飛指帝鄉忠心奮千祀清埃播無疆神武睦三正
裁成被八荒明兩燭河陰慶霄薄汾陽鑿於歷顏寢飾
像薦嘉嘗聖心豈徒甄惟德在無忘逝者如可作揆子
慕周行濟濟屬車士粲粲翰墨場瞽夫違盛觀竦踊企
一方四達雖平直蹇步愧無良食和忘微遠延首詠太

康

雍容瑋麗

庶幾雅什

王撫軍庾西陽集別時為豫章太守庾被徵還

東

謝還豫章庾被徵還都王
撫軍送至湓口南樓作

祇召旋北京守官反南服方舟析舊知對筵曠明收舉
觴矜飲餞指迷念出宿來晨無定端別晷有成速顏陽
照通津夕陰暖平陸榜人理行艫輜軒命歸僕分手東
城闔發櫂西江隩離會雖相雜逝川豈徃復誰謂情可
書盡言非尺牘

荅靈運

夕霽風氣涼閒房有餘清開軒滅華燭月露皓已盈獨
夜無物役寢者亦云寧忽獲愁霖唱懷勞奏所誠歎彼
行旅艱深茲眷言情伊余雖寡慰殷憂暫為輕牽率酬
嘉藻長揖愧吾生

一起四語清映絕倫體物之
佳能使景色現前身嘗其趣

古詩鏡卷十二

欽定四庫全書

古詩鏡卷十三

明陸時雍編

宋第二

謝靈運

陳郡陽夏人以祖父並葬始寧縣遂移籍會稽
晉孝武時襲封康樂公累遷黃門侍郎時宋公

位相國以為從事中郎遷世子左衛率及宋受禪降
爵為侯起為散騎常侍轉太子左衛率武帝崩出為
永嘉太守在郡辭歸始寧文帝登作徵為秘書監遷
侍中未幾復稱疾歸好尋山陟險會稽太守孟覲表
其有異志帝惜其才授臨川內史復為有司所
糾徙廣州尋以事詔就廣州棄市年四十九

謝康樂靈襟秀色挺自天成清貴之氣抗出塵表
大抵性靈物穢詩之美惡辨於此矣 陶謝性靈
披寫不屑屑
於物象之間

詩

述祖德詩二首

序曰大元中王父龕定淮南負荷世業專主隆人逮
賢相祖謝君子道消拂衣蕃岳考卜東山事同樂生
之時志期范蠡之舉

達人貴自我高情屬天雲兼抱濟物性而不櫻垢氛段

生藩魏國展季救魯人弦高犒暗

舊作晉誤

師仲連卻秦軍

臨組乍不緹對珪寧肯分惠物辭所賞厲志故絕人苔

苔歷千載遙遙播青塵清塵竟誰嗣明哲垂經綸委講

綴

當作輟

道論改服康世屯屯難既云康尊主隆斯民

中原昔喪亂喪亂豈解已崩騰永嘉末逼迫太元始河

外無反正江介有蹙圯萬邦咸震懾橫流賴君子拯溺

由道情龕暴資神理秦趙欣來蘇燕魏遲文軌賢相謝

世運遠圖因事止高揖七州外拂衣五湖裏隨山疏瀆

潭傍巖藝粉梓遺情拾塵物貞觀丘壑美

語氣高岸遠人貴自我高情屬天雲魚抱濟物性
而不櫻垢氣一似天馬脫轡矯首騰驥世屯既云
康尊主隆斯
民巖然高峙

九日從宋公戲馬臺集送孔令

季秋邊朔苦旅鴈違霜雪淒淒陽卉腓皎皎寒潭絜

潔同

良辰感聖心雲旗興暮節鳴葭戾朱宮蘭卮獻時哲
宴光有孚和樂隆所缺在宥天下理吹萬羣方悅歸客
遂海隅脫冠謝朝列弭棹薄枉渚指景待樂闕河流有

急澗浮駮無緩轍豈伊川途念宿心愧將別彼美丘園
道喟馬傷薄劣

淒淒陽卉腓皎皎寒潭潔又野曠沙岸淨
天高秋月明語何清洌似枕流漱石得來

從遊京口北固應詔

玉璽戒誠信黃屋示崇高事為名教用道以神理超昔
聞汾水遊今見塵外鑣鳴笳發春渚稅鑿登山椒張組
眺倒景列筵矚歸潮遠巖映蘭薄白日麗江皋原隰萋
綠柳墟囿散紅桃皇心美陽澤萬象咸光昭顧已枉維

繫撫志慙場苗工拙各所宜終以及林巢曾是紫舊想
覽物奏長謠

玉璽戒誠信黃屋示崇高事為名教用道以神理
超語超皇心美陽澤萬物咸光昭結撰精粹他人
費許澄練 二語品貴而韶 漢魏景物畧而病
於疎唐人飾而嫌於偽稱情當物正在陶謝間耳

永初三年七月十六日之郡初發都

述職期闌暑理棹變金素秋岸澄夕陰火旻團朝露辛
苦誰為情遊子值顏暮愛似莊念昔久敬曾存故如何
懷土心持此謝遠度李牧愧長袖郤克慙躡步良時不

見遺醜狀不成惡日余亦支離依方早有慕生幸休明
世親蒙英達顧空班趙氏璧徒乖魏王玠從來漸二紀
始得傍歸路將窮山海迹永絕賞心悟

隣里相送至方山

祇役出皇邑相期憇甌越解纜及流潮懷舊不能發
析就衰林皎皎明秋月含情易為盈遇物難可歇積疴
謝生慮寡慾罕所闕資此永幽棲豈伊年歲別各勉日
新志音塵慰寂蔑

解纜及流湖懷舊不能發淵明叩世新秋月臨流
別友生最得物態而指點甚便良由性情超會故
此至

過始寧墅

束髮懷耿介逐物遂推遷
違志似如昨二紀及茲年
緇磷謝清曠疲苾慙貞堅
拙疾相倚薄還得靜者便
剖竹守滄海枉帆過舊山
山行窮登頓水涉盡洄沿
巖峭嶺稠疊洲縈渚連綿
白雲抱幽石綠篠媚清漣
葺宇臨迴江築觀基曾巔
揮手告鄉曲二載期歸旋
且為樹枌檟無

令孤願言

白雲抱幽石綠篠媚青蓮語何悠
曠外有物色內有性情一并照出

富春渚

宵濟漁浦潭旦及富春郭定山緬雲霧赤亭無淹薄
逝流觸驚急臨圻阻參錯亮乏伯昏分險過呂梁壑
洊至宜便習兼山貴止託平生協幽期淪躓困微弱
久露干祿請始果遠遊諾宿心漸申寫萬事俱零落
懷抱既昭曠外物徒龍蠖

七里瀨

羈心積秋晨積展遊眺孤客傷逝湍徒旅苦奔峭石
淺水潺湲日落山照曜荒林紛沃若哀禽相叫嘯遭物
悼遷斥存期得要妙既秉上皇心豈屑末代諠目覩嚴
子瀨想屬任公釣誰謂古今殊異代可同調

晚出西射堂

步出西城門遙望城西岑連障疊嶽崿青翠杳深沈曉
霜楓葉丹夕曛嵐氣陰節往感不淺感來念已深羈雌

戀舊侶迷鳥懷故林含情尚勞愛如何離賞心撫鏡華
緇鬢攬帶緩促矜安排徒空言幽獨賴鳴琴

登池上樓

潛虬媚幽姿飛鴻響遠音薄霄愧雲浮樓川乍淵沈進
德智所拙退耕力不任狗祿反窮海卧疴對空林衾枕
昧節候寨開暫窺臨傾耳聆波瀾舉目眺嶮嶽初景革
緒風新陽改故陰池塘生春草園柳變鳴禽祁祁傷幽
歌萋萋感楚吟索居易永久離羣難處心持操豈獨古

無悶徵在今

池塘生春草抄秋尋遠山山遠
行不近非力非意自然神韻

遊南亭

時竟夕澄霽雲歸日西馳密林含餘清遠峰隱半規久
痲昏墊苦旅館眺郊岐澤蘭漸被徑芙蓉始發池未厭
青春好已觀朱明移戚戚感物歎星星白髮垂藥餌情
所止衰疾忽在斯逝將候秋水息景偃舊崖我志誰與
亮賞心惟良知

時竟夕澄霽雲歸日西馳密林
含餘清遠峯隱半規語色清峭

遊赤石進帆海

首夏猶清和芳草亦未歇水宿淹晨暮陰霞屢興沒周
覽倦瀛壖况乃凌窮髮川后時安流天吳靜不發揚帆
採石華掛席捨海月溟漲無端倪虛舟有超越仲連輕
齊組子牟眷魏闕矜名道不足適已物可忽請附任公
言終然謝天伐

首夏猶清和芳草
亦未歇佳韻自然

登江中孤嶼

江南倦歷覽江北曠周旋
懷新道轉迴尋異景不延亂
流趨正絕孤嶼媚中川
雲日相輝映空水共澄鮮
表靈物莫賞蘊真誰為傳
想像崑山姿緬邈區中緣
始信安期術得盡養生年

亂流趨正絕此景人所不道然言之自佳孤嶼媚中川此山水賞心語得趣既饒故賦景自別

石室山詩

清旦索幽異放舟越垌郊
莓莓蘭渚急藐藐苔嶺高
石

室冠林陬飛泉發山椒虛泛徑千載崢嶸非一朝鄉村
絕聞見樵蘇限風霄微戎無遠覽總筭羨升喬靈域久
韜隱如與心賞交合歡不容言摘芳弄寒條

登上戍石鼓山詩

旅人心長久憂憂自相接故鄉路遙遠川陸不可涉汨
汨莫與娛發春托登躡歡顏既無並威慮庶有協極目
眎左澗迴顧眺右狹日未澗增波雲生嶺逾疊白芷競
新苔綠蘋齊初葉摘芳芳靡諼愉樂樂不變佳期緬無

像騁望誰云愜

日暮澗增波

語實景自在

初去郡

彭薛裁知恥貢公未遺榮
或可優貪競豈足稱達生
伊余秉微尚拙訥謝浮名
廬園當棲巖卑位代躬耕
顧已雖自許心迹猶未并
無庸方周任有疾像長卿
畢娶類尚子薄遊似邴生
恭承古人意倣裝返柴荆
牽絲及元興解龜在景平
負心二十載於今廢將迎
理棹遄還期

遵渚鶩修垞，遡溪終水涉。登嶺始山行，野曠沙岸淨。天
高秋月明，憇石挹飛泉。攀林蹇落英，戰勝臞者肥。鑿止
流歸停，即是義唐化。獲我擊壤情。

野曠沙岸淨天高秋
月明語氣清曠無際

田南樹園激流植援

樵隱俱在山，由來事不同。不同非一事，養疴亦園中。
園屏氛雜清，曠招遠風卜。室倚北阜啓，扉面南江激。澗
代汲井，挿槿當列壙。羣木既羅戶，衆山亦當牕。靡迤趨

下田迢遞瞰高峯，寡欲不期勞。即事罕人功，唯開蔣生
逕。永懷求羊蹤，賞心不可忘。妙善冀能同。

樵隱俱在山，由來事不同。不同非一事，養病亦園
中。中國屏氛雜，清曠招遠風。得趣既深任，意披寫
佳境自成清。曠招遠風，最是勝句。詩謂獨寐寤
宿，永矢弗告。此云賞心不可忘，妙善冀能同，皆是
得趣
深處

石壁精舍還湖中作

昏旦變氣候，山水含清暉。清暉能娛人，遊子憺忘歸。出
谷日尚早，入舟陽已微。林壑斂暝色，雲霞收夕霏。芰荷

送映蔚蒲稗相因依披拂趨南逕愉悅偃東扉慮澹物
自輕意愜理無違寄言攝生客試用此道推

昏旦變氣候山水含清輝簡潔澗盡千言得此二
語去緣飾而得簡要由簡要而入微妙詩之妙境
盡此矣林壑歛暝色雲霞收夕霏
其言如半壁倚天秀色削出

登石門最高頂

晨策尋絕壁夕息在山棲疏峯抗高館對嶺臨迴溪長
林羅戶穴積石擁階基連巖覺路塞密竹使徑迷來人
忘新術去子惑故蹊活活夕流駛噉噉夜猿啼沈冥豈

別理守道自不攜心契九秋榦目翫三春萋居常以待
終處順故安排惜無同懷客共登青雲梯

心契九秋榦目玩三

春萋情物融然無間

石門新營所在四面高山迴溪石瀨茂林修竹
躋險築幽居披雲卧石門苔滑誰能步葛弱豈可捫嫋
嫋秋風過萋萋春草繁美人遊不還佳期何由敦芳塵
凝瑤席清醕滿金尊洞庭空波瀾桂枝徒攀翻結念屬
霄漢孤景莫與護俯濯石下潭仰看條上猿早聞夕飈

急晚見朝日散崖傾光難留林深響易奔感往慮有復
理來情無存庶持乘日車得以慰營魂匪為衆人說冀

與智者論

顏延年登巴陵城樓起云江漢分楚望衡巫奠南
服三湘淪洞庭七澤藹荆牧靈運石門新營起云
躋險築幽居披雲卧石門苔滑誰能步葛弱豈可
捫當前景物入手便辦畧無齟齬羞阻大家步武
端在
此處

於南山往北山經湖中瞻眺

朝旦發陽崖景路憩陰峯舍舟眺迴渚停策倚茂松側

逕既窈窕環洲亦玲瓏
俛視喬木杪仰聆大壑
淙石橫
水分流林密蹊絕蹤
解作竟何感升長皆
丰容初篁苞
綠篠新蒲含紫茸
海鷗戲春岸天雞弄
和風撫化心無
厭覽物眷彌重不惜
去人遠但恨莫與同
孤遊非情歎

賞廢理誰通

俛視喬木杪仰聆大壑淙
早聞夕颺急晚見朝日
瞰俯仰恍惚景物畧具
描畫妝點無所用之詩
以本色為佳自然為妙
俛視四語只一布置景色
已悉此詩人造景不造
詞也野曠沙岸淨天高
秋月明春晚綠野秀岩
高白雲屯但俱本色風
味自成此詩人寫照不
寫贊也此是擁絕上流
一著

初篁芭綠藉新蒲，含紫茸。海鷗戲春岸，天難弄。和風語氣，丰容覺春色融和。恍然與對歌遊，非情歎賞，廢理誰通此。

中深有領會

從斤竹澗越嶺溪行

猿鳴誠知曙，谷幽光未顯。巖下雲方合，花上露猶泫。逶傍隈隩，迢遞陟陁岨。過澗既厲急，登棧亦陵緬。川渚屢徑復，乘流翫迴轉。蘋萍泛沈深，菰蒲冒清淺。企石挹飛泉，攀林摘葉卷。想見山阿人，薜蘿若在眼。握蘭勤徒結，折麻心莫展。情用賞為美，事昧竟誰辨。觀此遺物慮。

一悟得所遣

猿鳴誠知曙谷幽光未顯岩下雲方合花上露猶
泣郁郁乎清芬渠自披陳物色了不作一詩意

千古以來幾許渴羌而淵明獨領其趣樵夫漁父
日夕出沒山水而靈運獨賞其神終身於此而不
覺是以口不能道耳味鳴四語亦只人眼前事以
謝見之獨親而言之獨切也蘋萍汎汎深菰蒲冒
清淺濯濯如洗

南樓中望所遲客

杳杳日西頽漫漫長路迫登樓為誰思臨江遲來客與
我別所期期在三五夕圓景早已滿佳人殊未適即事

怨睽攜感物方悽感孟夏非長夜晦明如歲隔瑤華未
堪折蘭苕已屢摘路阻莫贈問云何慰離析搔首訪行
人引領冀良覲

一起情湧結
復顯顯無已

廬陵王墓下作

曉月發雲陽落日次朱方含悽泛廣川灑淚眺連岡眷
言懷君子沈痛切中腸道消結憤懣運開悲悲涼神期
恒若存德音初不忘徂謝易永久松柏森已行延州協

心許楚老惜蘭芳解劍竟何及撫墳徒自傷平生疑若
人通蔽互相妨理感深情慟定非識所將脆促良可哀
天枉特兼常一隨往化滅安用空名揚舉聲泣已瀝長
歎不成章

氣格最遒情長語短晚月發雲陽落日次未方舍
悽泛廣川灑淚毗連岡一似自叙一似告語惠連
西陵遇風獻康樂昨發浦陽洶今宿浙
江湄途踪旅次樂與親知具道之也

還舊園作見顏范二中書

辭滿豈多秩謝病不待年偶與張邴合久欲還東山聖

靈昔迴眷微尚不及宣何意衝飈激烈火縱炎煙焚玉
發崑峯餘燎遂見遷投沙埋既迫如叩願亦愆長與歡
愛別永絕平生緣浮舟千仞壑總轡萬尋巔流沫不足
險石林豈為艱閩中安可處日夜念歸旋事蹟兩如直
心愜三避賢託身青雲上棲巖挹飛泉盛明盪氛昏貞
休康屯遭殊方感成貸微物豫采甄感深操不固質弱
易板纏曾是反昔園語徃實款然曩基即先築故池不
更穿果木有舊行壤石無遠延雖非休憩地聊取永日

閒衛生自有經息陰謝所牽夫子照清素探懷授往篇

酬從弟惠連

寢瘳謝人徒滅迹入雲峯巖壑寓耳目歡愛隔音容永
絕賞心晤長懷莫與同末路值令弟開顏披心胸

心胸既云披意得咸在斯凌澗尋我室散帙問所知夕
慮曉月流朝忌曛日馳悟對無厭歇聚散成分離

分離別西川迴景歸東山別時悲已甚別我情更延傾
想遲嘉音果枉濟江篇辛勤風波事款曲洲渚言

洲渚既淹時風波子行遲務協華京想詎存空谷期猶
復惠來章抵足攬余思儻若果歸言共陶暮春時

暮春雖未交仲春善遊遨山桃發紅萼野蕨漸紫苞嚶
鳴已悅豫幽居猶鬱陶夢寐佇歸舟釋我吝與勞

登臨海嶠初發疆中作與從弟惠連可見羊何

共和之

杪秋尋遠山山遠行不近與子別山阿含酸赴修畛中
流袂就判欲去情不忍顧望脰未悞汀曲舟已隱

金史卷之三十三
卷十三
隱汀絕望舟驚棹逐驚流欲抑一生歎并奔千里遊日
落當棲薄繫纜臨江樓豈惟夕情斂憶爾共淹留

淹留昔時歡復增今日歎茲情已分慮况乃協悲端秋
泉鳴北澗哀猿響南巖戚戚新別心淒淒久念攢

攢念攻別心旦發清溪陰暝投剡中宿明登天姥岑高
高入雲霓還期那可尋儻遇浮丘公長絕子徽音

顧望脰未悵汀曲舟已隱豈惟
夕情斂憶爾共淹留含情極妙

初發石首城

白珪尚可磨斯言易為緇雖抱中孚又猶勞貝錦詩寸
心若不亮微命察如絲日月垂光景成貸遂兼茲出宿
薄京畿晨裝搏曾颺重經平生別再與朋知辭故山日
已遠風波豈還時迢迢萬里帆茫茫終何之遊當羅浮
行息必廬霍期越海陵三山遊湘歷九嶷欽聖若旦暮
懷賢亦悽其皎皎明發心不為歲寒欺

語到真時詩到至處能令意象名言俱喪此中何
容下一閒言重經平生別再與朋知辭九死一生
得此

苦語

入東道路詩

整駕辭金門命旅惟詰朝懷居顧歸雲指塗沂行聽屬
值清明節榮華感和韶陵隰繁綠杞墟岡祭紅桃鳴鳴
翬方雉織織麥垂苗隱軫邑里密緬邈江海遼滿目皆
古事心賞貴所高魯連謝千金延州權去朝行路既經
見願言寄吟謠

道路憶山中

采菱調易急江南歌不緩楚人心昔絕越客腸今斷斷

絕雖殊念俱為歸慮歎存鄉爾思積憶山我憤懣追尋栖
息時偃卧任縱誕得往非外求自己為誰纂不怨秋夕
長常苦夏日短濯流激浮湍息陰倚密竿懷故叵新歡
含悲忘春暖悽悽明月吹惻惻廣陵散殷勤訴危柱慷
慨命促管

一起托典便成語無定軌正如水注渠成殷
勤訴危柱慷慨命促管耿耿如訴顯有餘情

入彭蠡湖口

客遊倦水宿風潮難具論洲島驟迴合圻岸屢崩奔乘

月聽哀狔泥露馥芳蓀春晚綠野秀巖高白雲屯千念
集日夜萬感盈朝昏攀崖照石鏡牽葉入松門三江事
多往九派理空存靈物吝珍恠異人秘精魂金膏滅明
光水碧輟流温徒作千里曲絃絕念彌敦

入華子岡是麻源第三谷

南州實炎德桂樹陵寒山銅陵映碧澗石磴瀉紅泉既
枉隱淪客亦棲肥遁賢險徑無測度天路非術阡遂登
羣峯首邈若升雲煙羽人絕髣髴丹丘徒空筌圖牒復

磨滅碑版誰聞傳莫辨百代後安知千載前且申獨往
意乘月弄潺湲恒克俄頃用豈為古今然

東陽溪中贈荅二首

可憐誰家婦緣流洗素足明月在雲間迢迢不可得
可憐誰家郎緣流乘素舸但問情若為月就雲中墮

琴可知人詩可知人靈運達人貴自我高情屬天
雲惠連平生無志意少小嬰憂患此是二君寫照
故曰詩可
以觀也

謝惠連

丹陽尹方明之子十歲能屬文元嘉元
年為彭城王法曹參軍年三十七卒

真惻不足繁飾有餘話多
蕪穢氣格亦厭厭頽落

詩

代古

一作擬客
從遠方來

客從遠方來贈我鵠文綾貯以相思篋絨以同心繩裁
為親身服著以俱寢興別來經年歲歡心不可凌瀉酒
置井中誰能辨斗升合如杯中水誰能判淄澠

秋懷

平生無志意少小嬰憂患如何乘苦心矧復值秋晏皎

皎天月明奕奕河宿爛蕭瑟含風蟬寥唳度雲鴈寒商
動秋閨孤燈曖幽幔耿介繁慮積展轉長宵半夷險難
預謀倚伏昧前算雖好相如達不同長卿慢頗悅鄭生
偃無取白衣宦未知古人心且從性所翫賓至可命觴
朋來當染翰高堂驟登踐清波時陵亂頽魄不再圓傾
義無兩旦金石終銷毀丹青暫彫煥各勉玄髮歡無貽
白首歎因歌遂成賦聊用布親串

靈運詩雖對偶然一往生韻行乎其間
雖好相如達不同長卿慢如此陋甚

擣衣

衡紀無淹度晷運倏如催白露滋園菊秋風落庭槐肅
肅莎雞羽烈烈寒螿啼夕陰結空幕宵月皓中閨美人
戒裳服端飾相招攜簪玉出北房鳴金步南階欄高砧
響發楹長杵聲哀微芳起兩袖輕汗染雙題紈素既已
成君子行未歸裁用笥中刀縫為萬里衣盈篋自余手
幽絨候君開腰帶准疇昔不知今是非

止結二語佳欄高砧響
發楹長杵聲哀穢甚

泛湖歸出樓中望月

日落泛澄瀛，星羅遊輕橈。
憩榭面曲汜，臨流對迴潮。
輟策共駢筵，並坐相招要。
哀鳴鴻沙渚，悲猿響山椒。
亭亭映江月，颺颺出谷飈。
斐斐氣幕岫，泫泫露盈條。
近矚祛幽蘊，遠視蕩諠囂。
晤言不知罷，從夕至清朝。

此作似
為清策

七月七日夜詠牛女

落日隱欄楹，升月照簾櫳。
團團滿葉露，析析振條風。
蹀

足循廣除瞬目矚曾穹雲漢有靈匹彌年闕相從遐川
阻暱愛修渚曠清容弄杼不成藻聳轡驚前蹤昔離秋
已兩今聚夕無雙傾河易迴幹款情難久悰沃若靈駕
旋寂寥雲幄空留情顧華寢遙心逐奔龍沈吟為爾感
情深意彌重

緝語太繁生韻絕
少却似晉人流弊

西陵遇風獻康樂

我行指孟春春仲尚未發趨途遠有期念離情無歇成

裴侯良辰漾舟陶嘉月瞻塗意少悰還顧情多闕
哲兄感化別相送越垞林飲餞野亭館分袂澄湖陰悽
悽留子言眷眷浮空心迴塘隱艫棹遠望絕形音
靡靡卽長路戚戚抱遙悲遙但自弭路長當語誰行
行道轉遠去去情彌遲昨發浦陽洶今宿浙江湄

古詩鏡卷十三

欽定四庫全書

古詩鏡卷十四

明 陸時雍 編

宋第三

鮑照

一作昭字明遠東海人文詞瞻逸尤長於樂府始謁臨川王義慶貢詩言志擢為國侍郎遷秣陵令

文帝選為中書舍人上方以文章自高頗多忌由是賦述不敢盡其才後臨海王子項鎮荊州以為前軍參軍時江外諸王皆拒命子項敗遂遇害

鮑照快典莫當麗藻時見所未足者韻耳凡鏗然而鳴屹然而止者聳耳韻氣悠然有餘韻則神行

乎間矣 七言開連

跌蕩第少調度和美

樂府

採桑

季春梅始落工女事蠶作採桑淇洧間還戲上宮閣早
蒲時結陰晚篁初解籜藹藹霧滿閨融融景盈幕乳燕
逐草蟲巢蜂拾花萼是節最暄妍佳服又新爍綿歎對
迴塗揚歌弄場藿抽琴試杼思薦珮果成託承君郢中
美服義久心諾衛風古愉艷鄭俗舊浮薄靈願悲渡相

必賦笑灑洛盛明難重來淵意為誰酒君其且調絃桂
酒妾行酌

採桑是摘二字為題耳非專賦也早
蒲時結陰晚篁初解擇語脆可賞

代蒿里行

同盡無貴賤殊願有窮伸馳波催永夜零露逼短晨驅
我幽山駕去此滿堂親虛容遺劍佩美貌戢衣巾斗酒
安可酌尺書誰復陳年代稍推遠懷抱日幽淪人生良
自劇天道與何人齋我長恨意歸為狐兔塵

代東門行

傷禽惡弦驚倦客惡離聲
離聲斷客情賓御皆涕零
涕零心斷絕將去復還訣
一息不相知何況異鄉別
遙遙征駕遠杳杳白日晚
居人掩閨卧行子夜中飯
野風吹草木行子心腸斷
食梅常苦酸衣葛常苦寒
絲竹徒滿座憂人不解顏
長歌欲自慰彌起長恨端

此詩直參漢製第鮑詩稜厲漢人渾渾耳居人掩
閨卧行子夜中飯野風吹草木行子心腸斷苦情
密調吐露
無餘矣

代放歌行

蓼蟲避葵葇習苦不言非小人自齷齪安知曠士懷鷄
鳴洛城裏禁門平旦開冠蓋縱橫至車騎四方來素帶
曳長飈華纓結遠埃日中安能止鐘鳴猶未歸夷世不
可逢賢君信愛才明露自天斷不愛外嫌猜一言分珪
爵片善辭草萊豈伊白璧賜將起黃金臺今君有何疾
臨路獨遲迴

吞聲踣躅自哂自嘲今君有何
疾臨路獨遲迴此疾正難語人

代權歌行

羈客離嬰時飄飄無定所
昔秋寓江介茲春客河澣
往戢于役身願言永懷楚
泠泠條疏潭邕邕鴈循渚
颺戾長風振搖曳高帆舉
驚波無留連舟人不躊躇

末四語楚

楚整峙

代白頭吟

直如朱絲繩清如玉壺冰
何慙宿昔意猜恨坐相仍
人
情賤恩舊世議逐衰興
毫髮一為瑕丘山不可勝
食苗

實碩鼠點白信蒼蠅鳧鵠遠成美薪芻前見陵申黜褒
女進班去趙姬升周王日淪惑漢帝益嗟稱心賞猶難
恃貌恭豈易憑古來共如此非君獨撫膺

驕嬗凌厲意氣咄咄逼人文君詩決裂已
甚後之作者安得溫語醒來婉詞送款耶

代東武吟

主人且勿誼賤子歌一言僕本寒鄉士出身蒙漢恩始
隨張校尉占募到河源後逐李輕車追虜窮塞垣密塗
巨萬里寧歲猶七奔肌力盡鞍甲心思歷涼溫將軍既

下世部曲亦罕存時事一朝異跡績誰復論少壯辭家
去窮老還入門腰鑰刈葵藿倚杖牧雞豚昔如韝上鷹
今似檻中猿徒結千載恨空負百年怨棄席思君幄疲
馬戀君軒願垂晉主惠不愧田子魂

代出自薊北門行

羽檄起邊亭烽火入咸陽徵師屯廣武分兵救朔方嚴
秋筋竿勁虜陣精且彊天子按劍怒使者遙相望雁行
緣石徑魚貫度飛梁簫鼓流漢颺旌甲被胡霜疾風衝

塞起沙礫自飄揚
馬毛縮如蝟角弓不可張
時危見臣節
世亂識忠良
投軀報明主
身死為國殤

後稷精爽筋力

如開百斛弓

代陳思王白馬篇

白馬駢角弓鳴鞭乘北風
要途問邊急雜虜入雲中
閉壁自往復清野徑還冬
僑裝多闕絕旅服少裁縫
埋身守漢節沈命對胡封
薄暮塞雲起飛沙被遠松
含悲望兩都楚歌登西墉
丈夫設計誤懷恨逐邊戎棄別中國

愛邀冀胡馬功去來今何道早賤生所鍾但令塞上兒
知我獨為雄

托腕說辭是
猛男兒語

代朗月行

朗月出東山照我綺窻前窻中多佳人被服妖且妍靚
粧坐帷裏當戶弄清弦鬢奪衛女迅體絕飛燕先為君
歌一曲當作朗月篇酒至顏自解聲和心亦宣千金何
足重所存意氣間

代結客少年塲行

驄馬金絡頭錦帶佩吳鉤
失意杯酒間白刃起相讐
追兵一旦至負劍遠行遊
去鄉三十載復得還舊丘
升高臨四關表裏望皇州
九衢平若水雙闕似雲浮
扶宮羅將相夾道列王侯
日中市朝滿車馬若川流
擊鍾陳鼎食方駕自相求
今我獨何為培塿懷百憂

搔首平生撫懷悲咤是
諷伏檻詩擊壺盡裂

代陽春登荆山行

且登荆山頭崎嶇道難遊
早行犯霜露苔滑不可留
極眺入雲表窮目盡帝州
方都列萬室層城帶高樓
奕奕朱軒馳紛紛縞衣流
日氛映山浦暄霧逐風收
花木亂平原桑柘盈平時
琴條弄紫莖藉露折芳柔
遇物雖成趣念者不解憂
且共傾春酒長歌登山丘

詩

侍宴覆舟山

息雨清上郊開雲照中
縣遊軒越丹居暉燭集
涼殿凌

高躋飛楹追焱起流宴栒苑含靈羣崑庭藏物變明輝
爍神都麗氣冠華甸目遠幽情周醴洽深恩遍

語極
追琢

登廬山

訪世失隱淪從山異靈士明發振雲冠升嶠遠棲趾高
岑隔半天長崖斷千里氛霧承星辰潭壑洞江汜嶄絕
類虎牙攢岼象熊耳埋冰或百年韜樹必千祀鷄鳴清
澗中猿嘯白雲裏瑤波逐穴開霞石觸峯起迴互非一

形差差悉相似傾聽鳳管竇緬望釣龍子松桂盈膝前
如何穢城市

從登香爐峯

辭宗盛荆夢登歌美鳧繹徒收杞梓饒曾非羽人宅羅
景謁雲扃沾光扈龍策御風親列涂乘山窮禹跡含嘯
對霧岑延蘿倚峯壁青冥搖煙樹穹跨負天石霜崖滅
土膏金澗測泉脉旋淵抱星漢乳竇通海碧谷館駕鴻
人巖棲咀丹客殊物藏珍怪竒心隱仙籍高世伏音華

綿古遁精魄蕭瑟生哀聽參差遠驚覲慙無獻賦才洗
汗奉毫帛

霜崖滅土膏金澗測泉脉旋淵抱星漢乳竇通海
碧語色峴翠如鑿石開山山水景趣謝靈運寫
得圓映絕明速寫得精警圓快得神
精警得意然而靈運之境地起矣

從庾中郎遊園山石室

荒塗趣山極雲崖隱靈室岡澗紛縈抱林障杳重密昏
昏磴路深活活梁水疾幽隅秉晝燭地牖窺朝日怪石
似龍草瑕壁麗錦質洞庭安可窮漏井終不溢沈空絕

景聲崩危坐驚慄神化豈有方妙象竟無述至哉鍊玉
人處此長自畢

語語琢出地窟窟

朝日巧鑿混沌

登翻車峴

高山絕雲霓深谷斷無光晝夜淪霧雨冬夏結寒霜淖
坂既馬領磧路又羊腸畏塗疑旅人忌轍覆行箱升岑
望原陸四眺望川梁遊子思故居離客遲新鄉新知有
客慰追故遊子傷

登黃鶴磯

木落江渡寒鴈還風送秋臨流斷商絃瞰川悲棹謳適
郢無東轅還夏有西浮三崖隱丹磴九派引滄流淚竹
感湘別弄珠懷漢遊豈伊藥餌泰得奪旅人憂

木落江渡寒鴈還
風送秋俊語挺出

贈故人馬子喬

躑躅城上羊攀隅食玄草俱共日月輝昏明獨何早夕
風飄野籜飛塵被長道親愛難重陳懷憂坐空老

日落望江贈荀丞

旅人之愉樂薄暮增思深日落嶺雲歸延頸望江陰亂
流瀉大壑長霧匝高林林際無窮極雲邊不可尋惟見
獨飛鳥千里一揚音推其感物情則知遊子心君居帝
京內高會日揮金豈念慕羣客咨嗟戀景沈

秋日示休上人

枯桑葉易零疲客心易驚今茲亦何早已聞絡緯鳴迴
風滅且起卷蓬息復征愴愴簟上寒悽悽帳裏清物色

延暮思霜露逼朝榮
臨堂觀秋草東西望
楚城百物方蕭瑟
坐歎從此生

清快

欲絕

吳興黃浦亭庾中郎別

風起洲渚寒雲上日無輝
連山眇煙霧長波迴難依
旅鴈方南過浮客未西歸
已經江海別復與親眷違
奔景易有窮離袖安可揮
懽觴為悲酌歌服成泣衣
溫念終不渝薄志遠存追
役人多牽滯顧路慙奮飛
昧心附遠

翰炯言箴佩章

與伍侍郎別

民生如野鹿知愛不知命飲齧具攢聚翹陸歛驚迸傷
我慕類心感爾食萍性漫漫鄢郢途渺渺淮海逕子無
金石質吾有犬馬病憂樂安可言離會孰能定欽哉慎
所宜砥德乃為盛貧游不可忘久敬念敦敬

從過舊宮

蕭裝屬雲旅奉鞠承末塗嚴恭履桑梓加敬覽粉榆靈

命蘊川瀆帝寶伏篇圖虎變由石紐龍翔自鼎湖功冠
生民始道妙神器初宮陛留前制歌思溢今衢餘祥見
雲物遺像存陶漁泉流信清泌原野實甘荼豈伊愛鄴
鄔天險兼上腴東秦邦北門非親誰克居仁聲日月懋
惠澤雲雨敷盧令美何歇唐風久不渝微臣逢世慶征
賦備人徒空費行葦德採束謝生芻

還都道中

風急訊濟浦裝高偃檣舳夕聽江上波遠極千里目寒

律驚窮蹊爽氣起喬木隱隱日沒岫瑟瑟風發谷鳥還
暮林誼潮上冰結狀夜分霜夜淒悲端出遙陸愁來攢
人懷羈心苦獨宿

風急訊灣浦萊高偃搗舳寫得快淨筆趣稍鈍即
帶穢色矣鮑照心關手敏遇物遂成可謂詩中一
能言之品舉目皆
凜素亦一佳句

上潯陽還都道中作

昨夜宿南陵今旦入蘆洲客行惜日月崩波不可留侵
星赴早路畢景逐前儔鱗鱗夕雲起獵獵曉風道騰沙

鬱黃霧翻浪揚白鷗登臚眺淮甸掩泣望荆流絕目盡
平原時見遠烟浮倏忽生還合俄思甚兼秋未嘗違戶
庭安能千里遊誰令乏古節貽此越鄉憂

行京口至竹里

高柯危且竦鋒石橫復仄複澗隱松聲重崖伏雲色冰
閉寒方壯風動鳥傾翼斯志逢凋嚴孤遊值曠逼兼塗
無憩鞍半菽不遑食君子樹令名細人効命力不見長
河水清濁俱不息

高柯危且竦鋒石橫復仄復澗隱松聲重
崖伏雲色景物入手歷落如次語色亦老

發後渚

江上氣早寒仲秋始霜雪從軍乏衣糧方冬與家別蕭
條背鄉心悽愴清渚發涼埃晦平臯飛潮隱修樾孤光
獨徘徊空煙視昇滅塗隨前峰遠意逐後雲結華志分
馳年韶顏慘驚節推琴三起歎聲為君斷絕

詠史

五都矜財雄三川養聲利百金不市死明經有高位京

城十二衢飛甍各鱗次
仕子影華纓游客竦輕轡
明星晨未晞軒蓋已雲至
賓御紛颯沓鞍馬光照地
寒暑在一時繁華及春媚
君平獨寂寞身世兩相棄

語色
鮮銳

擬古

魯客事楚王懷金襲丹素
既荷主人恩又蒙令尹顧
日宴罷朝歸輿馬塞衢路
宗黨生光輝賓僕遠傾慕
富貴人所欲道得亦何懼
南國有儒生迷方獨淪誤
伐木清

江湄設置守兔兔

意致深穩

絕有漢氣

幽并重騎射少年好馳逐
氊帶佩雙鞬象弧挿彫服
獸肥春草短飛鞚越平陸
朝遊鴈門上暮還樓煩宿
石梁有餘勁驚雀無全目
漢虜方未和邊城屢翻覆
留我一白羽將以分虎竹

獸肥春草短

亦一佳句

東嶽幽篁裏刈黍寒澗陰
朔風傷我肌號鳥驚思心歲

暮井賦訖程課相追尋田租送函谷獸藁輸上林河渭
水未開關隴雪正深笞擊官有罰呵辱吏見侵不謂乘
軒意伏櫪還至今

臨川王服竟還田里

送舊禮有終事君慙懦薄稅駕罷朝衣歸志願巢壑尋
思邈無報退命愧天爵捨耨將十齡還得守場藿道經
盈竹筍農書滿塵閣愴愴秋風生戚戚寒緯作豐霧祭
草華高月麗雲崿屏跡勤躬稼衰疾倚芝藥顧此謝人

羣豈直止商洛

行樂至城東橋

鷄鳴關吏起伐鼓早通晨嚴車臨迥陌延瞰歷城闔蔓
草緣高隅修楊夾廣津迅風首旦發平路塞飛塵擾擾
遊宦子營營市井人懷金近從利撫劍遠辭親爭先萬
里塗各事百年身開芳及推節含綵吝驚春尊賢永照
灼孤賤長隱淪容華坐銷歇端為誰苦辛

容華坐銷歇端為誰苦
辛正是不免所以為歎

園中秋散

負疾固無豫晨衿悵已單
氣交蓬門疎風數園草殘
荒墟半晚色幽庭憐夕寒
既悲月戶清復叨夜蟲酸
流枕商聲苦騷殺年志闌
臨歌不知調發興誰與歡
儻結絃上情豈孤林下彈

氣交蓬門疎風數園草殘
氣韻絕勝當與靈運爭衡

觀圃人藝植

善賈笑鸞鰲魚巧宦賤農牧遠養遍
闕市深利窮海陸乘

軺實金羈當壚信珠服居無逸身伎安得坐梁肉徒承
屬生幸政緩吏平睦春畦及耘藝秋場早艾築澤閱既
繁高山營又登熟抱挿壠上餐結茅野中宿空織已尚
淳寧知俗翻覆

歲暮悲

霜露迭濡潤草木互榮落日夜改運周今悲復如昨晝
色苦沈陰白雪夜迴薄皦潔冒霜鴈飄揚出風鶴天寒
多顏苦妍容逐丹壑絲罨千里心獨宿乏然諾歲暮美

人還寒壺與誰酌

在江陵數年傷老

五難未易夷三命戒淵抱方瞳起松髓頰髮疑桂腮役
坐良自休大患安足保開簾窺景夕備屬雲物好翺翺
燕弄風嫋嫋柳垂道池瀆亂蘋萍園援美花草節如驚
灰異零落就衰老

翫月城西門解中

始出西南樓纖纖如玉鈎末映東北墀娟娟似娥眉娥

眉蔽珠櫳玉鈎隔鎖牕三五二八時千里與君同夜移
衡漢落徘徊帷幌中歸華先委露別棄早辭風客遊厭
苦辛任子倦飄塵休澣自公日晏慰及私辰蜀琴抽白
雪郢曲發陽春肴乾酒未闕金壺啓夕淪迴軒駐輕蓋
留酌待情人

三日

氣暄動思心柳青起春懷時艷憐花藥服淨俛登臺提
觴野中飲心愛煙未開露色染春草泉源潔水苔泥泥

濡露條嬋嬋承風裁鳧雛掇苦薺黃鳥銜櫻梅解衿欣
景預臨流競覆杯美人竟何在浮心空自推

鮮翠照人 捉觴野中飲心愛烟未開是適然境
亦適然語凡景過即亡情生即已即使再陳前迹
恐意趣之非初矣故詩中之意
畫中之境不可以有物求也

秋夜

遁跡避紛喧貨農棲寂寞荒徑馳野風空庭聚山雀既
遠人世歡還賴泉卉樂折柳樊場圃負綆汲潭壑霽旦
見雲峯風夜聞海鶴江介早寒來白露先秋落麻壘方

結葉瓜田已掃箒傾暉忽西下迴景思華幕攀蘿席中
軒臨觴不能酌終古自多恨幽悲共淪鑠

樂府

代白紵舞歌詞四首

侍郎臣鮑照啓被教作白紵舞歌詞謹竭庸陋裁為
四曲附啓上呈識方泐悴思塗猥局言既無雅聲未
能文不足以宣贊聖旨抽拔妙實謹遣簡餘慙隨悚
盈謹啓詞曰

吳刀楚製為佩褱織羅霧縠垂羽衣含商咀徵歌露晞
珠履颯沓紈袖飛淒風夏起素雲回車息馬煩客忘歸
蘭膏明燭承夜輝

桂客栢寢擬天居朱爵文窻韜綺疏象牀瑤席鎮犀渠
雕屏匝匝組帷舒秦箏趙瑟挾笙竽垂璫散珮盈玉除
停觴不御欲誰須

三息參差霧露濕弦悲管清月將入寒光蕭條候蟲急
荆王流歎楚妃泣紅顏難長時易戢凝華結綵久延立

非君之故豈安集

池中赤鯉庖所捐琴高乘去騰上天命逢福世丁溢恩
簪金藉綺升曲筵恩德德深委如山潔誠洗志期暮年
烏白馬角寧足言

歷而
俊

代白紵曲二首

朱唇動素腕舉洛陽少年邯鄲女古稱淶水今白紵催
弦急管為君舞窮秋九月荷葉黃北風驅鴈天雨霜夜

長酒多樂未央

春風澹蕩俠思多天色
淨綠氣妍和含桃紅萼蘭紫芽
朝日灼爍發園華卷幌結帷蘿
玉筵齊謳秦吹盧女弦
千金顧笑買芳年

代鳴鴈行

邕邕鳴鴈鳴始旦齊行命侶入雲漢
中夜相失羣離亂
留連徘徊不忍散憔悴容儀君不知
辛苦風霜亦何為

擬行路難

奉君金卮之美酒瑇瑁玉匣之雕琴七綵芙蓉之羽帳
九華蒲萄之錦衾紅顏零落歲將暮寒光宛轉時欲沈
願君裁悲且減思聽我抵節行路吟不見栢梁銅雀上
寧聞古時清吹音

洛陽名工鑄為金搏山千斲復萬縷上刻秦女攜手仙
承君清夜之歡娛列置帷裏明燭前外發龍鱗之丹
綵內含麝芬之紫煙如今君心一朝異對此長歎
終百年

璇閨玉墀上椒閣文窻繡戶垂羅幕中有一人字金蘭
被服織羅采芳藿春燕參差風散梅開幃對景弄春爵
含歌攬涕不能言人生幾時得為樂寧作野中之雙鳧
不願雲間之別鶴

瀉水置平地各自東西南北流人生亦有命安能行歎
復坐愁酌酒以自寬舉杯斷絕歌路難心非木石豈無
感吞聲躑躅不敢言

君不見河邊草冬時枯死春滿道君不見城上日今暝

沒盡去明朝復更出今我何時當得然一去永減入黃
泉人生苦多歡樂少意氣敷腴在盛年且願得志數相
就牀頭恒有沽酒錢功名竹帛非我事存亡貴賤付皇
天

對案不能食拔劍擊柱長歎息丈夫生世會幾時安能
蹠蹠垂羽翼棄置罷官去還家自休息朝出與親辭暮
還在親側弄兒牀前戲看婦機中織自古聖賢盡貧賤
何況我輩孤且直

中庭五株桃一株先作花陽春妖治二三月從風簸蕩
落西家西家思婦見悲惋零淚霑衣撫心歎初送我君
出戶時何言淹留節迴換牀席生塵明鏡垢纖腰瘦削
髮蓬亂人生不得恒稱意惆悵徙倚至夜半

劉蘂染黃絲黃絲歷亂不可治我昔與君始相值爾時
自謂可君意結帶與君言死生好惡不相置今日見我
顏色衰意中索寞與先異還君金釵玳瑁簪不忍見此
益愁思

君不見枯籜走階庭何時復青著故莖君不見亡靈蒙
享祀何時傾杯竭壺罍君當見此起憂思寧及得與時
人爭人生條忽如絕電華年盛德幾時見但令縱意存
高尚旨酒嘉肴相胥讌持此從朝竟夕暮差得亡憂消
愁怖胡為惆悵不能已難盡此曲令君忤

春禽啾啾旦暮鳴最傷君子憂思清我初辭家從軍僑
榮志溢氣干雲霄流浪漸冉經三齡忽有白髮素髭生
今暮臨水拔已盡明日對鏡復已盈但恐羈死為鬼客

客思寄滅生空精每懷舊鄉野念我舊人多悲聲忽見
過客問何我寧知我家在南城答云我曾居君鄉知君
遊宦在此城我行離邑已萬里今方羈役去遠征來時
聞君婦閨中孀居獨宿有貞名亦云悲朝泣閒房又聞
暮思淚霑裳形容憔悴非昔悅蓬鬢衰顏不復粧見此
令人有餘悲當願君懷不暫忘

君不見少壯從軍去白首流離不得還故鄉
昏昏日夜隔音塵斷絕阻河關朔風蕭條白雲飛胡笳哀極邊氣

寒聽此愁人兮奈何登山遠望得留顏將死胡馬跡能
見妻子難男兒生世轆軻欲何道綿憂摧抑起長歎
君不見栢梁臺今日丘墟生草萊君不見阿房宮寒雲
澤雉栖其中歌妓舞女今誰在高墳累累滿山隅長袖
紛紛徒競世非我昔時千金軀隨酒逐樂任意去莫令
寒歎下黃墟

行路難俱

蕩而不曠

梅花落

中庭雜樹多偏為梅咨嗟問君何獨然念其霜中能作
花露中能作實搖蕩春風媚春日念爾零落逐寒風徒
有霜華無霜質

孤標
峻絕

代淮南王

淮南王好長生服食鍊氣讀仙經琉璃作盃牙作盤金
鼎玉七合神丹合神丹戲紫房紫房綵女弄明璫鸞歌
鳳舞斷君腸朱城九門門九閨願逐明月入君懷入君

懷結君佩怨君恨君恃君愛築城思堅劍思利同成同
衰莫相棄

最是
古意

代雉朝飛

雉朝飛振羽翼專場挾兩恃彊力媒已驚翳又逼蒿間
潛穀盧矢直刎繡頸碎錦臆絕命君前無怨色握君手
執杯酒意氣相傾死何有

慷慨
絕色

代北風涼行

北風涼雨雪雱京洛女兒多妍粧遙艷帷中自悲傷沈
吟不語若有忘問君何行何當歸苦使妾坐自傷悲慮
年至慮顏衰情易復恨難追

哀音急節
苦語深衆

代空城雀

雀乳四敷空城之阿朝食野粟夕飲冰河高飛畏鳩鷯
下飛畏網羅辛傷伊何言怵迫良已多誠不及青鳥遠

食玉山禾猶勝吳宮燕無罪得焚窠賦命有厚薄長歎
欲如何

代夜坐吟

冬夜沈沈夜坐吟含聲未發已知心霜入幕風度林朱
燈滅朱顏尋體君歌逐君音不貴聲貴意深

清俊

絕倫

代春日行

獻歲發吾將行春山茂春日明園中鳥多嘉聲梅始發

柳始青汎舟艫齊櫂驚奏採菱歌鹿鳴風微起波微生
絃亦發酒亦傾入蓮池折桂枝芳袖動芬葉披兩相思
兩不知

詩

吳歌

夏日樊城岸曹公却月樓觀見流水還識是儂淚流

幽蘭

簾委蘭蕙露帳含桃李風攬帶昔何道坐今芳節終

結珮徒分明抱梁輒垂忤華落知不終空愁生相誤

春詠

節運同可悲莫若春光甚和風未及燠遺涼清且凜

古詩鏡卷十四